



UPA 2026/10-1

19. maj 2026

Aqqalu C. Jerimiassen

Atassut

Aningaasaqarnikkut ingerlatsineq pillugu nalunaarut 2026

(Aningaasaqarnermut Naalakkersuisoq)

Aningaasaqarneq, ila aningaasaqarneq.

Ukiuni kingullerni arfinilinni nunarsuatsinni pissutsit qanorluunniit nassuiassallugit nalornginarpoq, tassalimi pisut tulleriaat ingattarseruttormata.

Suna tamassuma malitsigaa? Suut tamarmik akitsoriartuinnarnerat, tassanilu qinikkat qaammarsagaanikkut ilisimasaqassutsip naammaginatsumik inissisimannginnera pillugu pisuutinniarneqartaqaat, nioqqutissanngooq akitsorsarigut, nipi taanna tusartalertuanguarparput. Ila qanoq ililluta maanngaanniit inersuarmit tomatit qillertuusamiittut ataatsit qanoq akeqarnissaat inississinnaagatsigu? Immaqaluunniit taanna Cubami sualuppallaarpoq kisermaassiffiusumi.

2020-imiit 2021 ilanngullugu Covid19, kingorna russit ukrainemut sorsulernerat, Israel-Gaza, Yemen, nunatta USA-mit tiguniarneqarluni tatineqarnera, USA-llu Iran-imut sorsulernerat.

Immaqa eqqarsarluarsimanngikkaanni aningaasarsiornerup silarsuaanut, tamakkununga tunngatillugu aperisoqarsinnaangaluarpoq; "ila tamakku avataani pisut uagut sussagatsigit uagutsinnut attuumassuteqanngitsut"?

Nunarsuarpulli tamakkerlugu aningaasarsiornikkut niuffannerullu silarsuaani suulluunniit aqqusaarneqartartut sorsunnermik allamilluunniit ajunaarnersuartut ittumik aqqusaarneqartillugit, suulluunniit sunniuttaraat ilimaginngeqqinnaarsinnaasagut attuumassuteqartut.

Soorlu Russit Ukrainelu sorsulivinnikkallarnerat sioqqullugu russit nunatsinnut niueqateqartarnerat piunikuvoq annertugisassaannikkaluamik sunniutilimilli.

Tamakku tamarmik sunniuteqartarput, taakkartoriikkagullu tapukkaanni tamaasa, ila aningaasarpasuit eqqartuleriasarpagut.

Utoqqartagut inuuttakkiartorput, taanna arlalitsigut ajunngittortaqaarsinnaagaluarpoq sulisussanik amingaateqarnitsinni ukiut soraarninngorfissaasut tikereeraluarlugit suli suleqqiinnassallutik aaliangertartut eqqarsaatigalugit, kisiannili tamatta kinarsuugutta kinannguuguttaluunniit ullusaqarpugut, naassaangitsumut piunngilagut. Sulisinnaasut nunatsinni ikinneruleriartorsillugit killiffippat unammilligassaq minneruleriartunngilaq, pilersuisinnaasut ikinneruleriartortut aningaasarsiornikkut annertuumik allannguilluinnartariaqarpugut, aningaasarsiornikkut qunneq ukiorpanni ornissimasarput kinguaallassaannarneqartarsimasoq maanna tassa tikikkaluttuarparput.



Taamaalinitinnilu asuli qujangequinnarluni politikernissaq pisariaqanngilaq, naalagaaffeqatigiinnerup iluani suleqateqarneq suli pisariaqarpoq.

Nunarsuattami sinnerani killiffiit eqqarsaatigalugit naalagaaffeqatigiinnerup iluani nalingiinnerusumik pineqartariaqarnerput maanna suliarinissaanut piffissaavoq. Atalimi taava pituttorneyunermut saqitinnagu, inuup ikiortarissap aqagu naalaaffinngorutta ikiugassaanini qaangersimajunnangilaa.

Uanilu qiningaaffiup nutaap aallartisimalernerani inuiaqatigiinni pikisitsiniaanerpassuarnik ikummarissaanernik kinguneqareeqisumi, eqqartukkat ilaat ikummarilluartoq soraarnerussutisianut katersisussaatitaanermut siunertaqartoq Atassummiit immikkut malunginiarumavarput. Tassami killiffimmi maannakkut qujanartumik naalakkersuisooqatigiit malunnaatilimmik iliuuseqalernerat takuneqarsinnaavoq, suleqatigiisitallu naammassinissaanut iliuusissat pitsaasuusinnaasut qilanaarnarput tusassallugit.

Katersisussaatitaaneq ilutsimini ilumoorpoq kukkunernik ulikkaarsimasoq, taamaattumillu siunissami innuttaasunut sunniutai toqqaannartut atorunnaariartuaassappata, aaqqiissummik pitsaanerpaamik nassaarsinnaasariaqarput oqaannarata toqqaanaq inatsisitaa peerlugu aningaasartassaanilluaasiit eqqarsarluaqqaarata.

Siunissamut isigisumik inissiissagutta katersisussaatitaaneq inummiikkunnaarlugu sulisitsisunut illikartariaqarnera Atassummiit piviusorsioortuunerusoraarput, taannaallunilu tassa inummut toqqaanaq tuttarunnaarnissaanik kinguneqartussa.

Aningaasarsiorfiit nutaat ukiorpassuarni "Aataqqii" Siverth K Heilmann-ip Atassummiit ilaasortaanermini eqqartortuartarpai, maannalu ukiorparujussuarni misissuisarsimanerpapiluunersuit kiisami inerneru nuillattaalersut takuneqarsinnaammat, ilaatigut soorlu taakku paasissutissarpasuit pioreersut atorlugit Tasersiamut Tarsartuullu tasersuarnut tungassuteqartut datacenterinik pilersitsisinnaanermut piviusunngoraluttuartaleqaat.

Siunissami pisartunut malinnaasariaqarpugut, eSport kiisami qanittukkut inatsisitigut akuerineqarpoq, Atassummiillu taanna qulequtaq ukiuni arfineq-pingasuni utaqqereerlutigu, kiisamiuna piviusunngullartoq.

Malungaarpulli taassumunga tunngatillugu oqartoqarniallattaasoq inuit ilaannit, tamanna kinguariarnerusoq, taamatuttaarlu sooq pingaarnerninngooq suliassaarluta tamakku salliukkigut.

Ila suliassat taakku pingaarnarit naammassineqarsinnaanissaat akeqarput, neriorsuutit tamarmik akeqarput, oqarluartaarutit tusarnernerpaat tassaakkajuttarputtaaq aamma akisunerpaat. eSport illuanit tassaavoq aningaasarsiornikkut nunatut annertuumik isertitsivissaasoq ukkanneqarluartuuppat, nunarsuullu sinneranut unammillerluarsinnaasumik unammiaarnikkut taamaallat nalimmaffigisinnaanersaarput.



Taamaamat taannaavoq tassa nunarsuarmioqataanitsinni unammiaarnerni erfalasutta amuneqartarnissaanut sakkussatta ilaat pingaarnerpaaq.

Sineriapput ineriartornikkut unammillingassanik imaannaangitsunik peqarpoq, esanip eqqunneqarnerata kingorna siunertaasimagunaraluarpoq nunatsinni eqqagassalerinikkut annertunerpaamik alloriaat malunnaatilik tamanut iluaqutissaq. Taamaattorli avannaaniit kujammut, kitaaniit kangimut, eqqagassalerinikkut takusartakkat allarlunnasarpasipput, eqiterussuilluni ukiuni amerlavallaani ingerlatsisimanerup kinguneri.

Kommunit aqqissuuteqqinneqarnissaat erininarsivoq, oqartussaaqataaneq nunatsinni amingaatigineqartutut inissisimasoq, ilaatigullu sinerissap sinnerani ineriartunnginnermut pisuutitsissutitut atorneqartartoq illikassagaanni kommunit nutaavimmik aqqiivigisariaqarneri piffissaavoq maannakkut.

Sulisoqarnikkut inissisimanitsinni, assaat sumiiffippassuarni amingaatigineqarnerini malunnarpoq nunarsuullu sinnera assigalutigu avataaniit suliertortorpassuit tikittalersut, unneqqarittariaqarpugullu tassani, tikittut taakku annertuginarsinnaangaluit arlalitsigut qujassutissaqarfigaagut nunatsinni sulisussameernerpaaffimmi suliffiit imaaliinnaq nunaqqatitsinnit nakerineqarneq ajortut suliffiguassallugit inuttalersormatikkitt. Aalisartortatta tunitsiveqaannarsinnaanerannut avammullu nioqqutitta pingaarnersaasa nioqqutissariinnarneqarsinnaanerarat piummat qujamasuutissaavoq.

Aalisarneq suli nunatsinni sukarsuit aningaasarsiornikkut pingaarnersaraat, taamaakkallartussaasorlu naatsorsuutigisinnaavarput. Aalisarnermut inatsit maanna atuuttoq iluarigaanni iluarinngikkaanniluunniit, tassa maanna atuuttuavoq akuerineqarnikummat. Taamaattumik iluaaginera iluarineraluunniit piilaarsinnarlugit, qanoq nalimmassarnissamut tassunga inatsimmut iliuusissat pingaarnarpaatut iliuusissaraagut, uani soorlu eqqarsaatigivagut aningaasalersuisarnikkut tapissarnertigullu aalisartunngortussanut aalisartunullu ineriartoqqikkusuttunut nutaavimmittaaq nalimmassaavigisassaraagut, aalisarnermummi inatsit allannguinaqataagassaangilaq nunatut avammut niuernitsinni avataanit aningaasaleerusussuseq tutsuiginartutut inissisimatissagutsigu. Tassani Atassummi suli suleqataaqqissalluta piareersimavugut.

Oqaatiginiakkat ila suli sorpassuusinnaangaluaqaat, taamaattorli Atassummiit taamatut oqaaseqarluta Naalakkersuisut Aningaasaqarnikkut ingerlatsineq pillugu nassuiaataat tusaatissatut tiguarput, Naalakkersuisullu sulilluarnissaanik kissaallutigit aningaasaqarnikkut ingerlatsineq peqqinnartumik inerisaannarsinnaaqullugu.